

## بسم الله الرحمن الرحيم

والصلاة والسلام على أشرف الخلق والمرسلين سيدنا محمد صلى الله عليه وسلم ثم أما بعد إن شاء الله هنحاول مع بعض الايام الجاية اننا نتكلم بشكل بسيط جدا عن بورصة العملات الاجنبية ( الفوركس ) إن شاء الله هحاول أبسط كلامي ولو في أي شئ مش واضح أنا في الخدمة واتمنى من الله أن يجعل هذا العمل خالصا لوجهه الكريم وأن يجعله في ميزان حسناتي وفي ميزان حسنات أي حد ساعد في نشر هذا العلم .

إن شاء الله هنقسم الشرح بتاعنا إلى اجزاء هنبداً في الجزء الاول بتعلم ركائز مهمة جدا .

الجزء الاول بتاعنا هيضم :

- ١ . مقدمة عاجية :
- نبذة مختصرة عن سوق الفوركس .
- مصطلحات هامة .
- ٢ . إدارة رأس المال .
- ٣ . شرح برنامج الميتاتريدر Meta Trader .
- ٤ . حركة السعر .
- ٥ . الدعور والمقاومات .
- ٦ . الترنادات .
- ٧ . الشهوع اليابانية .
- ٨ . الفيوناتشي .
- ٩ . تطبيق على الجزء الاول .

إن شاء الله كلامي هيكون بسيط جدا وطبعاً لو في أي مشكلة او اي شئ مش واضح ههكن تبلاغني من خلال الجروب على الفيس بوك ( فوركسوهاجية ) وهنوضحها مع بعض .

فوركسوهاجية  
لهل حاجة لتفعلك

هنبدأ على بركة الله مع الجزء الاول وأول حاجة معنا في الجزء ده هي ..

= مقدمة عامة :

ودي هنتكلم فيها عن حاجتين وهما :

- نبذة مختصرة عن سوق الفوركس .
- مصطلحات هامة .

نبذة مختصرة عن سوق الفوركس :

طبعا لما نقول سوق فوركس يبقى اكيد لازم نتعرف على حاجتين الأولى وهي كلمة سوق والثانية هي كلمة فوركس .

طيب نمسكهم واحدة واحدة الأولى ( سوق ) طبعا حضراتكم عارفين يعني ايه سوق .... طيب وايه المانع اننا نقول برضه يعني

ايه سوق : السوق ده مكان بيكون فيه بائعين ومشتريين طيب ودول بيعملوا ايه في السوق ؟؟ اكيد طبعا مش بيرغوا مع بعض ☺

اكيد بيكون في بينهم تعاملات ( تجارة ) وحلقة الوصل ما بينهم بتكون السلعة وهي دي الطرف الثالث في السوق .

طيب يبقى عرفنا بشكل سريع ان لو اتكلنا وقولنا سوق يبقى لازم نقول ٣ حاجات ( بائعين – مشتريين – سلع ) .

طيب دلوقتي هنمسك الكلمة الثانية وهي ( فوركس ) .. طيب اكيد لو حد ميعرفش يعني ايه فوركس هيقول وده ايه ده ان شاء

الله ؟؟ طيب ركز معايا وهتعرف ايه ده .

اكيد حضرتك سمعت قبل كده عن حاجة اسمها بورصة ، صح ؟ اهو الفوركس ده عبارة عن بورصة ... بس خلي بالك مش بورصة

أسهم وسندات .. لأ دي بورصة العملات الاجنبية ... مش مستوعب ، صح ؟؟ طيب أبسطها لك ☺ احنا اتكلنا فوق عن السوق

صح ؟ اهو الفوركس ده زيه زي أي سوق .. لازم يكون فيه ٣ حاجات مهمة فاكرهم ولا لا ؟؟ ايوه صح كده سامعك بتقول ( بائعين –

مشتريين – سلع ) .. الله ينور عليك .

طبعا ممكن واحد هنا يقول طيب بائعين وساهلة ومشتريين وكمان ممكن نستوعبها ... بس المشكلة في السلعة مش مستوعب

النقطة دي .

طيب ركز معايا كده وصل على الحبيب المصطفى .. ( عليه الصلاة والسلام )

ببساطة شديدة جدا سوق الفوركس ده بيتتم فيه بيع وشراء العملات يعني السلع في السوق ده هي العملات .. طيب واحد هيقول طيب انا في السوق العادي انا بشترى كيلو الطماطم بـ ٥ جنيه . طيب في سوق الفوركس اللي بتقول عليها دي هشتري العملة وهدفع لصاحب الكشك بتاع العملات ايه ؟؟؟؟ اولاً يا عمونا العملات مش بتتباع في كشك دي بتتباع في سوق الاتنين .. ☺ طبعاً اوعى حد يصدق سوق العملات ده سوق لامركزي يعني ملهوش مكان محدد نقدر نقول عليه هو ده السوق بتاع العملات وعلى فكرة دي من أهم ما يميز سوق الفوركس .. المهم نرجع للنقطة بتاعت انا هشتري عملة طيب هدفع ايه .؟؟ أولاً يا عمونا لازم نتفق على حاجة بسيطة ان سوق العملات ده بيتتم تداول فيه اكثر من عملة يعني ايه ؟؟ يعني السوق ده هتلاقي فيه عملة امريكا ( الدولار ) عملة اليابان ( الين ) عملة منطقة اليورو ( اليورو ) ... وغيرهم من العملات .. فمن البديهي لما نيجي نقول اننا هنشترى عملة اكيد هندفع مكانها عملة بلد تاني . طبعاً انت هتدخل السوق علشان تشتري عملة معينة بسعر وتستنى لما سعرها يرتفع وتبيعه وتستفاد من الفرق ... زي أي تجارة .. طيب ايه رأيك انك ممكن تكسب كمان من البيع .. طيب ما انت لو حسبتها انك في الحالتين بتكون شاري وبايح في نفس الوقت يعني بتشتري عملة وتبييع عملة في نفس الوقت وهكذا وان شاء الله الجزئية دي هتوضح شوية لقدام ... طيب انا عندي كام سؤال كده لو سمحت يا مصطفى ....

تحت امرك يا غالي بس الاول نتكلم كده عن شوية مصطلحات .

ودي هي النقطة الثانية معنا دلوقتي ..

مصطلحات هامة :

هنحاول في النقطة دي نتعرف على مصطلحات هتقابلنا كتير في السوق طبعاً احنا هنتكلم عنهم بس ممكن نأجل الكلام عن كام مصطلح لوقتهم .

المصطلحات اللي هنتكلم عنهم النهاردة هي :

• مفهوم أزواج العملات

• النقطة ( البيب )

• الاسبريد

• الروافع المالية والهامش

• العقد ( اللوت )

اول مفهوم معنا انهاردة هو :

## • أزواج العملات :

يعني ايه أزواج العملات .. ؟ ومالك يا عمر مصطفى داخل سخن علينا كده ليه ؟؟

يا عمر لا سخن ولا حاجة بس خليك فايق معايا وانت هتعرف ان الكلام ده لعب عيال .

اولا انت لما بتروح السوق بتشتري طماطم اكيده بتدفع فلوس صح ؟؟

كده انت عملت زوج من غير ما تعرف .. ازاي ؟؟ هقولك انا ازاي انت لما اشتريت طماطم دفعت فلوس يعني لازم علشان تتم العملية دي لازم يكون في حاجتين .. اول الفلوس اللي هتشتري بيها الطماطم اللي لو مكنتش معاك مكنتش هتنزل السوق من اساسه .. صح ؟؟ طيب وايه الحاجة الثانية .. ؟ الحاجة الثانية هي : الطماطم اللي انت نازل تشتريها . لانك لو مش عاوز طماطم ومعاك فلوس هتنزل ليه السوق ؟؟ هتنزل تقول للناس انا معايا فلوس ؟ 😊 اكيده لا طبعا ؟ يبقى انت دلوقتي عملت زوج اللي هو ( طماطم - فلوس ) .

في سوق الفوركس برضه هتشتغل خطبة وهتجوز العملات مع بعض .. يعني ايه ؟؟

يعني مثلا انت دلوقتي حببت تروح تغيير كام ريال سعودي من شركة الصرافة بجنيهات مصري هتروح تقول للراجل الصراف خذ دي ريات سعودي ... وهات جينهات مصري .. هتلاقي هي هي عملية الطماطم اللي فوق ان لازم علشان تتم العملية دي لازم يكون معاك ريات سعودي .. ويكون في شركة الصرافة جينهات مصري .. صح ؟؟

طيب برضه يعني ايه زوج عملات وايه اللي هستفاده منه ؟؟؟

انا هقولك ببساطة مثال فعلي من سوق الفوركس :: هنفترض انك دلوقتي معاك ١٠٠٠ دولار امريكي وحببت انك تشتري يورو هتعمل ايه ؟؟ اكيده بتقول هروح لكشك عمو محمد بتاع العملات وهديله الدولارات وهاخد يوروهات .. صح ؟؟ ياخذ عدوينك ان شاء الله 😊 يا عمونا ما انا قولتك مفيش حاجة اسمها كشك عملات .. المهم ما علينا انت كده صح بس طبعا انت عاوز تعرف سعر اليورو مقابل الدولار كام صح ؟؟ طبعا انت هتدور على سعر صرف اليورو مقابل الدولار وهتلاقيه بغض النظر هتلاقيه فين انما هتلاقيه بالشكل ده :

$$\text{EUR} \backslash \text{USD} = 1.3000$$

هو ده بقى شكل زوج العملة بتلاقي سعر عملة مقابل عملة تاني .. طيب ايه رأيك لو نوضح أكثر ..

لو مسكنا الزوج السابق ده وحبينا اننا نقتطعة :

اولا حاجة هناخدھا هي : EUR

وطبعا انت شطار وعارف ان ده رمز عملة اليورو وهنسميه هنا في الزوج اسم ( عملة الاساس ) .

تاني حاجة هي : USD

وطبعا برضه انت شاطر وعارف ان ده رمز عملة الدولار الامريكي وهنسميه هنا أسم ( عملة المقابلة ) .

طيب يعني ايه عملة اساس ويعني ايه عملة مقابلة ... ؟؟

عملة الاساس دي العملة اللي انت عاوز تشتريها وعلى فكرة مش شرط تكون يورو لا ده مثال بس للتوضيح يعني ممكن يكون ( ين ياباني ) او ( دولار استرالي ) أو اي عملة تاني .. المهم عملة الاساس دي عاملة زي الطماطر اللي انت نازل تشتريها .

طيب وعملة المقابلة يعني ايه ... ؟؟

ايوه صح كده سامعك بتقول ان هي دي العملة اللي انت بتدفعها كمقابل علشان تاخد عملة الاساس .. فإفكر انت طبعا لما اشتريت طماطر من السوق دفعت مقابلها فلوس صح ؟؟ اهو عملة المقابلة زي كده بالظبط .

طيب عرفنا عملة الاساس وعرفنا عملة المقابلة .. طيب سؤال صغير ايه الرقم اللي مكتوب بعد علامة ( = ) .. ؟؟

ده يا عمونا بيدل على سعر اليورو مقابل الدولار يعني ايه ؟؟ يعني علشان تاخد ١ يورو لازم تدفع ١,٣٠٠٠ دولار .

طيب هنتكلم دلوقتي على تاني مصطلح معنا وهو

• النقطة ( البيب ) :

يعني ايه يا مصطفى ؟؟

سيبك منها يا عم وركز معايا في الحكاية دي بس ..

ايه رأيك امبارح كان كيلو الطماطر بـ ٣ جنيه .. النهاردة بـ ٤ جنيه ..؟ ينهار أبيض .. !!

سعرها ارتفع صح .. طيب ارتفع كام ؟؟؟ صح كده سامعك بتقول ١ جنيه ..

طيب ايه رأيك لو انا قولتلك ان سعر اليورو ارتفع مقابل الدولار .. طيب هيرتفع كام ؟؟

ايه رأيك لو قولتلك انه كان من شوية صغيرين = ١,٣٠٠٠ وبقى دلوقتي = ١,٣٠٠١ ايه ده عني ارتفع ٠,٠٠١ بس؟؟

ايوه ٠,٠٠١ بس .. ودي بقى هنسميها نقطة أو بيب ..

يعني مثلا في التغير ده هنقول أن السعر ارتفع بمقدار نقطة واحدة .. طيب ولو بقى ١,٣٠١٠ هنقول ان السعر ارتفع بمقدار ١٠ نقطة وهكذا وهو ده مصطلح النقطة أو البيب .

طيب ايه رأيك نتكلم عن

• الاسبريد :

برضه سيبك منه دلوقتي وخليك معايا ..

اكيد طبعا انت راجل مثقف وبتقرا جرايد صح؟؟ ايه رأيك لو انت فتحت الجورنال في يوم من الايام وعينك جات على اسعار صرف العملات الاجنبية .. هتلاقي مثلا سعر صرف الريال السعودي وهتلاقي مكتوب سعر البيع وسعر الشراء صح؟

اهو نفس الوضع عندنا في الفوركس هتلاقي ان سعر البيع لليورو مقابل الدولار = ١,٣٠٠٠ وسعر الشراء = ١,٣٠٠٣ ايه ده في فرق ٣ بيب يا مصطفى ..؟؟؟؟ ايوه صح فيه فرق ٣ بيب وهما دول عمولة الشركة اللي بتتعامل معاها .. وده بقى اسمه سبريد ..

فيه مشكلة لغاية هنا ..؟

طيب ايه رأيك لو نتكلم عن ..

• الروافع المالية والهامش :

قبل ما ندخل في الموضوع ده وعلى فكرة ده موضوع مهم جدا بس سهل جدا ... هندردش الاول مع بعض ..

ايه رأيك في اليورو / دولار دلوقتي سعره = ١,٣٠٠٠ ايه رأيك انت قولت انا هشتري وهبيع لما السعر يرتفع شوية .. طيب انت اشتريت ١٠٠ يورو والسعر ارتفع فعلا وبقى ١,٣٠٠١ يعني ارتفع نقطة واحدة طيب تعالي نشوف انت لو بيعت دلوقتي هتكسب كام .. انت هتكسب في اليورو الواحد ٠,٠٠١ طيب وانت معاك ١٠٠ يبقى مكسب ٠,٠١ دولار ينهار ابيض دول بس ؟؟؟؟؟ ده مش مكمين ١٠ سنت ( السنن بالنسبة للدولارزي القرش بالنسبة للجنيه المصري ) ... طيب والحل؟؟؟

الحل أنك تشتري كميات ياريس ... طيب يعني كام مثلا؟؟ يعني مثلا يا غالي تشتري ١٠٠٠٠٠ يورو ... يعني يا عمر مصطفى انا لو معايا ١٠٠٠٠٠ يورو كنت اتكلمت معاك اصلا ☺ ... على فكرة يا عمونا دي تعتبر مش فلوس بالنسبة للسوق ده طيب ايه رأيك هقولك معلومة كده على السريع انت عارف حجم التداول في سوق الفوركس = ٤ ترليون دولار يوميا !!!..

طيب والعمل يا عمر مصطفى؟؟ العمل يا سيدي الفاضل هو الروافع المالية !!..

يعني ايه الروافع المالية .؟؟

انا هقولك الروافع المالية دي هي حل اللغز بالنسبة ليك ... طيب برضه يعني ايه؟؟؟

ركز معايا يا غالي وانا هقولك ... الروافع المالية ببساطة مثلا لو انت معاك ١٠٠٠ دولار وعاوز تشتري مثلا ١٠٠٠٠٠ يورو أو اي عملة تاني هتقدر تشتري ... طيب ازاى؟؟ الحكاية وما فيها الشركة مثلا هتقدملك قوة شرائية اضعاف رأس مالك يعني مثلا الشركة هتقولك انا هديلك رافعة مالية ٤٠٠:١ يعني ايه؟؟ يعني الشركة هتديلك ٤٠٠ ضعف لرأس مالك يعني مثلا لو انت عاوز تشتري ١٠٠٠٠٠ يورو ... هتقسم ١٠٠٠٠٠ ÷ ٤٠٠ = ٢٥٠ دولار بس ... يعني هتدفع ٢٥٠ دولار للشركة وهيفضل معاك ٧٥٠ دولار طيب كويس يا عمر مصطفى انا أخذ ١٠٠٠٠٠ يورو دول واخلع واضحك على الشركة .. هقولك ماشي يا ابو دم خفيف مكنش حد غلب كنت انا اول واحد اخدت فلوس وخلعت ☺ .. طبعا الفلوس دي مش هتاخدها في أيديك لا الشركة هتشتريك بيهم ولما تكسب ان شاء الله الشركة هترجعلك الـ ٢٥٠ دولار بتوعك اللي هما زي تأمين كده وده بنسبيه هامش مستخدم .. وهتاخذ فلوسها وانت حلال عليك المكسب كامل .. طيب لو خسرت يا مصطفى؟؟؟ زي ما انت هتاخذ المكسب كامل برضه هتتحمل الخسارة كاملة .. بس الخسارة دي هتكون كام مثلا ... طيب ايه رأيك نتكلم بالارقام في مثال بسيط ..

هنفترض ان سعر اليورو مقابل الدولار دلوقتي = ١,٣٠٠ وان معاك في الحساب بتاعك في الشركة ١٠٠٠ دولار

وخلص قررت انك هتشتري ١٠٠٠٠ يورو علشان انت بتتوقع ان اليورو سعره هيرتفع .. طيب ايه اللي هيحصل كل اللي هيحصل ان الشركة هتسحب منك ٤٠٠ ÷ ١٠٠٠ = ٢٥ دولار ( على فكرة هما مش ٢٥ بالظبط ممكن يكون فيه كسور لان اليورو اغلى من الدولار ودي حاجة متشغلش نفسك بيها البرنامج هيحسب كل حاجة من غير ما توجع دماغك ) اللي هما هامش مستخدم ( زي تأمين ) هيفضل كام معاك في الحساب؟؟

١٠٠٠ - ٢٥ = ٩٧٥ وده المبلغ الباقي في الحساب بتاعك وده هنسبيه الهامش المتاح ..

طيب تعالى نفترض افتراضين الاول في حالة المكسب والثاني في حالة الخسارة ( لا قدر الله )

الاول المكسب : طيب افترضنا ان السعر اتغير ووصل ١,٣٠٥٠ يعني السعر اتغير ٥٠ نقطة طيب مكسب هيكون كامر ..

٠,٠٥٥ × ١٠٠٠٠ = ٥٠ دولار تمام وانت خلاص قررت انك تنهي الصفقة يعني تبيع اليوروهات اللي انت اشتريتها .. خلاص يبقى الشركة هتاخذ ١٠٠٠٠ يورو وهرجعلك ٢٥ التأمين ( اللي هما كانوا هامش مستخدم ) وكمان هترجعلك مكسبك كامل اللي هو ٥٠ دولار ..

طيب الافتراض الثاني : الخسارة ..

هنفترض ان السعر نزل ( هبط ) ووصل ١,٢٩٥٠ يعني هبط ٥٠ نقطة .. يبقى انت خسران كامر ؟؟ ايوه صح كده ٥٠ دولار طيب لو انت قررت انك تقفل الصفقة او تنهيتها ... ايه اللي هيجصل ..؟؟ كل اللي هيجصل ان الشركة هتاخذ ١٠٠٠٠ يورو اللي هما بتوعها وهرجعلك الـ ٢٥ دولار ( هامش مستخدم ) وهرخصم من الهامش المتاح ( ٩٧٥ ) الخسارة اللي هي ٥٠ دولار طيب افرض الخسارة زادت ... بص يا سيدي الخسارة ممكن تزيد عادي جدا بس طبعاً الشركة مش هتقبل انها تدفعلك من جيبيها علشان كده الشركة هتقولك اخسر براحتك بس لو وصلت الخسارة لغاية الهامش المتاح ( اللي هما ٩٧٥ ) يبقى انا هقفل الصفقة غصب عنك علشان اضمن اخذ ١٠٠٠٠ يورو كاملين ... ازاي يعني كاملين ..؟؟ انا هقولك انت لو خسرت اكر من ٩٧٥ دولار يبقى مفيش حل قدام الشركة غير انها تخصص الخسارة دي من ١٠٠٠٠ يورو .. طيب يبقى كده هي مش هتاخذ المبلغ كامل ودي فلوس يتامة 😊 طيب سامعك بتقول طيب ما هو فيه ٢٥ دولار وخداهم ضمان ( هامش مستخدم ) طيب يا سيدي في بعض الشركات ممكن تكمل عليهم يعني تستني الخسارة لما توصل ١٠٠٠ دولار وفي شركات مش بتتقرب عليهم يعني تستني الخسارة لغاية لما توصل ٩٧٥ وتقف الصفقة وتاخذ ١٠٠٠٠ يورو وترجعلك في الحساب ٢٥ دولار ... ولما يجصل كده ( الخسارة توصل للهامش المتاح ) يبقى هنا حصل حاجة اسمها نداء الهامش ....

طيب يبقى كده احنا قولنا كامر حاجة تتعلق بالهامش ...؟؟

ايوه بالضبط كده ٣ حاجات وهما :

الهامش المستخدم : وده عبارة عن مبلغ التأمين اللي بتخصمه الشركة من حسابك في سبيل انها تزود قدرتك الشرائية .

الهامش المتاح : وده عبارة عن المبلغ الباقي في الحساب بعد خصم الشركة الهامش المستخدم .

نداء الهامش : وده بقى بيجيبك لما الخسارة تزيد وتوصل لغاية الهامش المتاح وساعتها الشركة بتقف الصفقات المفتوحة غصب عنك .

كده خلصنا كل حاجة متعلقة بالروافع المالية والهامش ..

هنتلکم عن اخر حاجة معنا في المصطلحات وهي :

• العقد ( اللوت ) :

من غير رغي كثير لاني صدعتكم ببساطة انت لما بتشتري الطماطم بتشتريها بالكيلو .. طيب والعصير؟؟ باللتر .. طيب والارض  
؟؟ بالتر .. طيب والعملات ..؟؟ بالعقد أو اللوت .. وعلى فكرة كلمة عقد هنا غير كلمة عقد اللي الدراجة في حياتنا ..

طيب فيه ٣ احجام من العقود ...

الاول : الاستاندرد ... وده حجمه ١٠٠٠٠٠ ( مائة ألف ) وحدة من العملة أي كانت العملة .

التاني : الميني ... وده حجمه ١٠٠٠٠ ( عشرة آلاف ) وحدة من العملة .

التالت : المايكرو ... وده حجمه ١٠٠٠ ( ألف ) وحدة من العملة .

يعني قدامك اهو ٣ احجام واشتري اللي يريحك بس متنساش المثل المصري الشهير ... على قد لحافك .. مدرجليك ... !!

وده اللي هنتعلمه مع بعض في إدارة رأس المال المرة القادمة إن شاء الله .

دمتم بكل الود والسلام عليكم ورحمة الله وبركاته .

بعذر لو فيه اي غلط كتابي لاني بكتب بدون مراجعة ..

أخوكم : مصطفى اليمني .

فوركسوهاجية  
جميع الحقوق محفوظة :: جروب فوركسوهاجية

<https://www.facebook.com/groups/ForexSohagia>

السلام عليكم ورحمة الله وبركاته ... عدنا من جديد مع الجزء المخصص لهذا اليوم ..

إن شاء الله اليوم هنتكلم عن أهم شئ في الفوركس ومن غيره هتكون مضارب فاشل ١٠٠٠٠٠٠٠ %

= إدارة رأس المال :

لو مكنتش بتعرف تعوم ومرة واحدة كده قررت انك ترمي نفسك من فوق الكوبري ايه اللي هيحصل ..؟؟ اكيد هتفرق صح؟؟  
يبقى لازم تتعلم أزاى تعوم الاول وبعد كده ترمي نفسك من الكوبري من البلكونة من اي حته براحتك 😊 ..

اهو إدارة رأس المال دي هي اللي هتعلمك ازاى تقدر ترمي نفسك في السوق من غير ما تفرق .. طيب ازاى؟؟

طيب الاول تعالوا نحكي حكاية بسيطة جدا لواحد اسمه عمر محمد ووحد اسمه عمر سمير...

عمر محمد ده كان عنده كشك بقالة صغير وكمان عمر سمير عنده كشك بقالة جنب بتاع عمر محمد .. وفي يوم من الايام ربنا رزق  
الاتنين بمبلغ كويس .. قعد عمر محمد وعمر سمير كل واحد منهم يفكر في بيته ازاى يستغل المبلغ ده بحيث انه يقدر يكسب منه  
...

عمر محمد وصل لفكرة وهي : : انه يشتري بالمبلغ ده كله بضاعة للكشك بتاعه علشان يكسب فلوس كتير علشان كل لما يجيب كتير  
هيبيع كتير وهيكسب كتير وبكده يبقى كبر المبلغ بتاعه ..!!

طيب وعمر سمير : : قرر انه يشتري بجزء بسيط من المبلغ ده بضاعة ويخلي الباقي معاه تحسباً للظروف ..

طيب تعالى نشوف ايه اللي حصل بعد كده ...

عمر محمد نزل واشترى بضاعة بالمبلغ كله ، وعمر سمير نزل واشترى بجزء بسيط من البضاعة والباقي مع الحكومة في البيت 😊  
اليوم اللي بعده عمر محمد اتوقع انه هيبيع كتير وهيكسب كتير .. طبعا لانه فاكرا ان كل ما اشتري وخرن هيكسب أكثر وأكثر ..  
فات أول يوم وتاني يوم وتالت يوم .. والبضاعة قاعده زي ما هي ..!! وعمر سمير برضه مش بيبيع كتير والبضاعة قاعده  
عنده والسوق نايم فجأة الاتنين عرفوا ان في صنف جديد نزل السوق والناس كلها عاوزه تشتريه ... طبعا عمر محمد مش عارف  
يعمل ايه ..؟؟ كل الفلوس اشتري بيها بضاعة ومش معاه اي فلوس تاني ... طيب وعمر سمير باقي معاه فلوس وعلى طول نزل  
واشترى الصنف الجديد ده وباع منه والحمد لله كسب وعمر محمد قاعد ندمان .. طيب يعمل ايه؟؟ البضاعة ممكن صلاحيتها  
تنتهي ويبقى كده خسر كل حاجة ..!! وهو قاعد جاله واحد تاجر وقاله انا ممكن اشتري البضاعة دي كلها بس بنصف سعرها  
!! عمر محمد طبعا كان زعلان جدا جدا لانه لو وافق هيبقى خسر نص فلوسه من غير ما يكسب .. طبعا عمر محمد لازم يوافق

لان البضاعة خلاص صلاحيتها قربت .. وفعلا اشترى الراجل ده البضاعة وعمر محمد خسر نصف فلوسه وعمر سمير كسب وزود فلوسه ..

طيب لو حللنا شخصية عمر محمد هنلاقي عنده ثلاث صفات : الطمع -- عدم الصبر -- عدم التفكير ..

انما عمر سمير : : مكنش طماع --- كان صبور -- وكان بييفكر كويس ..

ها تحب تكون زي مين ؟؟

عمر محمد -- ولا عمر سمير ؟؟؟

سوق الفوركس زي كده بالظبط .. لازم تكون صبور .. لازم تنسى الطمع .. ولازم تفكر كويس ومتخفش .. والا هم من ده كله لازم تكون مؤمن أن رزقك مش هيروح لغيرك ..

طيب ايه رأيك لو نتكلم بمثال عملي ومن الفوركس ونفترض شوية اقتراضات .. بس قبل ما نفترض .. ايه رأيكم ناخذ كام مصطلح كده على الماشي ..

هنتكلم عن :

حاجة اسمها (أمر جني الربح) أو take profit :

ايه ده يا مصطفى وايه اللي جاب البتاع ده هنا ؟؟ معلى ركز معايا وانت هتعرف ان الكلام ده تافه وانا قصدت اني اقولوا هنا ... انت دلوقتي مثلا لو معاك فدان ارض وكنت شاربه على اساس التجارة بـ ٥٠٠ ألف جنيه وقولت انا هستنى لما يوصل ٧٥٠ ألف وهبيع على طول .. وفعلا السعر وصل زي ما انت عاوز بس للأسف انت مكنتش موجود وكنت مسافر ولما جيت من السفر كان السعر نزل تاني ... طيب تعمل ايه لما تسافر المرة الجاية ..؟؟

اكيد طبعا هتشوف سمسار وتقول له لو السعر وصل ٧٥٠ ألف بيع صح ؟؟

اهو هو ده امر جني الربح انك حددت للسمسار سعر وقولتله لما يوصل لكذا بيع ..

نفس الحكاية بالنسبة في الفوركس .. انك بتقول للشركة لو السعر وصل لغاية كذا خلاص افضل الصفقة على الربح ده من غير ما ترجعلي ..

طيب ده في حالة الربح ولو في حالة الخسارة ..

لو انت مثلا فاتح صفقة ( يعني شاري عملة معينة ) مثلا من السعر ١,٥٠٠٠ على اساس انها هترتفع وقولت للشركة لو السعر وصل ١,٥٠٥٠ خلاص افضلي الصفقة على الربح ده ( ٥٠ نقطة ) .. طيب لو قدر بنا والسعر نزل وانت مش موجود قدام الشاشة وفضل ينزل ينزل لغاية لما جالك نداء الهامش ... فاكهه؟؟ ينهار ابيض يعني لما ترجع وتفتح حسابك هتلاقيه اتدمر ... طيب واياه الحل؟؟ .. انت ممكن تقول انا خيليني اقول للشركة لو السعر نزل لغاية ١,٤٩٥٠ ( يعني - ٥٠ ) افضلي الصفقة على الخسارة دي لان انت متوقع لو السعر وصل للنقطة دي يبقى لسه قدامه مزيد من الهبوط ( هنتعلم ازاى تتوقع الحاجات دي بعدين ) ..

ده بقى اسمه امر وقف الخسارة ..

يبقى عرفنا ان امر جني الارباح عكسه امر وقف الخسارة ..

طيب نرجع تاني للمثال ..

هنفترض انك معاك مثلا حساب بـ ١٠٠٠ دولار وانت متوقع ان اليورو هيصعد .. يبقى انت خلاص فكرة انك تشتري ... صح؟؟

طيب اول سؤال هيجي في بالك انت هتشتري كام؟؟ هتشتري اي نوع من اللوات ( العقود )؟؟ ستاندرد .. ميني ... ولا مايكرو؟؟

طيب تعالوا نتفق اتفقا .. اولا احنا عرفنا حجم كل عقد من دول كام صح ..؟؟ طيب واياه المانع اننا نفتكر مع بعض ..

الاول : ستاندرد .. ١٠٠٠٠٠ وحدة من العملة طيب لو حبينا نعرف العقد ده لو اشتريناه كل نقطة زيادة هتمثل كام مكسب لينا يعني من الاخر مكسب النقطة كام؟؟ طيب بسيطة احنا نضرب  $١٠٠٠٠٠ \times ٠,٠٠٠١ = ١٠$  دولار يعني كل نقطة السعر هيطلعها احنا هنكسب ١٠ دولار وكل نقطة السعر هينزلها احنا هنخسر ١٠ دولار والعكس في حالة البيع ..

طيب لو حبينا نعرف قيمة النقطة بالنسبة للعقد الميني ( ١٠٠٠٠ وحدة من العملة ) برضه هنضرب  $١٠٠٠٠ \times ٠,٠٠٠١ = ١$  دولار وهكذا .. بالنسبة للمايكرو ( ١٠٠٠ وحدة من العملة ) هنضرب  $١٠٠٠ \times ٠,٠٠٠١ = ٠,١٠$  دولار ( ١٠ سنت ) .. تمام كده طيب نرجع تاني للمثال بتاعنا ..

انت هتشتري كام؟؟؟

اكيد طبعا انا سامعكم كله بيقول انا هشتري ستاندرد النقطة بـ ١٠ دولار يعني الواحد ياخدله ١٠ نقاط ( وعلى فكرة ده ممكن يحصل في دقائق ) يبقى الواحد كسب ١٠٠ دولار يعني ٦٠٠ جنيه مصري في دقائق ... ده الموظف مش بياخدهم في الشهر ...

والله يا حبيبي الغالي لو بالسهولة دي الواحد كان زمانه عمل المليون الرابعة ☺ بس المشكلة ان انت ممكن تتوقع ان السعر يطلع ١٠ نقاط وده عادي ممكن يحصل وتكسب ١٠٠ دولار بس ممكن السعر ينزل ١٠ نقاط يعني هتخسر ١٠٠ دولار يعني لو حسبناها ١٠٠ دولار بالنسبة لرأس مالك ( ١٠٠٠ دولار ) يبقى انت خسرت ١٠٪ ينهار يعني كلها ٩ صفقات تاني زي كده وتقرأ الفاتحة على الحساب بتاعك يعني في دقائق ممكن تخسر ١٠٠٠ دولار ... طيب وده ليه ؟؟ انا هقولك ليه ..

لانك عملت زي عمر محمد :: اولاً كنت طماع .. مفكرتش كويس .. مكنتش صبور ..

طيب وانت تنصحنى بأيه يا مصطفى ..؟؟ انا هنصحك نصيحة واحدة بس لو انت مقتنعتش انك لازم تكون زي عمر سمير .. يبقى كلامي ملهوش اي لازمة ..

لازم تفكر كويس .. لازم تعرف ازاي تتصاحب على السوق ومتكوتش ليه عدو لانك لو عملت فيها بطل ووقفت في وش السوق لازم السوق هياكلك .. علشان انت معرفتش تضحك على السوق معرفتش تاخذ اللي عاوزه منه من غير ما يزعل ..

طيب برضه يا مصطفى مرفعتش انا هعمل ايه ؟؟ انا هقولك انت هتقعد بينك وبين نفسك وتشوف ايه قيمة النقطة المناسبة اللي لورينا قدر وخسرت هتكون خسارة مقبولة .. ولو كسبت برضه يكون مكسب كويس .. طيب ايه رأيك انا ممكن اساعدك بطريقة ممكن تمشي بيها في الاول لغاية لما تعرف نظام نفسك ...

انت ممكن تحدد وقف الخسارة الاول .. طبعا مش هتعرف تحده غير لما تتعلم ازاي تحلل وتتوقع حركة السعر وبعد كده تقول لنفسك انت مستعد تخسر كام ٪ من حسابك ؟؟؟ في الصفقة دي ؟؟ انا لو مكانك هقول مثلاً ٣ ٪ .. طيب وبعدين يا مصطفى .. هنفترض انك مثلاً حددت وقف الخسارة ٣٠ نقطة ... طيب الاول ٣ ٪ دول يعني كام من الحساب ؟؟ احسبها انت بقى وهتطلع معاك ... ٣٠ دولار ولو طلعت غير كده ابقى قولي ... طيب عرفنا دلوقتي اننا مستعدين اننا نخسر ٣٠ دولار ووقف الخسارة ٣٠ نقطة .. بس برضه معرفناش ندخل بكام النقطة .؟؟ بسيطة انت دلوقتي كله اللي هتعمله انك هتقسم الـ ٣٠ دولار على الـ ٣٠ نقطة هيطلع الناتج ١ دولار يعني انت هتدخل النقطة بـ ١ دولار ( عقد ميني ) .. وهكذا .. طيب سامع واحد بيقول طيب والمكسب ؟؟؟ ياعم الحاج المكسب زي ما يكون بقى ٣ ٪ ٥ ٪ ١٠ ٪ مش إشكال اكيد مش هتقول للمكسب لأ بس طبعا يستحسن ميقبلش عن ٣ ٪ علشان المخاطرة تكون معقولة لانك مش هتخاطر بـ ٣ ٪ علشان تكسب في الآخر ٥ ٪ ... !!! ياعم مصطفى انت مش بتقول لازم ميكنش فيه طمع .. ياعم وده ماله ومال الطمع ..؟؟ طيب تعالي نفترض افتراض بسيط .. لو انت مثلاً عملت ٦ صفقات وكل واحد فيههم كان ( امر جنى الريح ) ٥ ٪ ووقف خسارة ٣ ٪ وكلهم الحمد لله وصلوا لأمر جنى الريح .. تعالي نفترض انك دخلت صفقة سابعة بس للأسف الصفقة دي كانت خسرانة ..!! يعني انت هتخسر ٣ ٪ يعني هتخسر مكسب ٦ صفقات .. صح؟؟ الحكاية وما فيها انك لازم تفكر كويس وتحسبها صح ..

مش عاوز اتكلم كتير في النقطة دي ... طبعا مش علشان هي مش مهمة لأعلشان هتحسها اكر لما تشتغل بأيدك ..

دمتم بكل الود والسلام عليكم ورحمة الله وبركاته .

بعذر لو فيه اي غلط كتابي لأنني بكتب بدون مراجعة ..

أخوكم : مصطفى اليمني .

جميع الحقوق محفوظة :: جروب فوركسوهاجية

<https://www.facebook.com/groups/ForexSohagia>

فوركسوهاجية  
لعمل حاجة لتفعلك